

四庫全書

集部

欽定四庫全書

清容居士集卷三十五

元表楠撰

內制

昭憲元聖皇后諡冊文

德合乾元母儀正而宸極立道參泰治王化基而國本
寧靖思保佑之功宜慎欽崇之典有嚴祔禮爰重尊名
欽惟太皇太后陛下淵靜體仁濟莊秉度憂勤潛邸清

謚治朝內教洽乎宮庭懿範著于海寓實生二聖光於
前聞用貽沖人纂茲丕緒方將樂怡愉以承至養率恭
儉以挹太和痛鑒興之莫旋儼珠衣之如在謹遣某官
奉玉冊玉寶上尊謚曰昭憲元聖皇后伏惟靈承顯冊
陟配宗祧錫羨家邦永延祚胤

英宗皇帝謚冊文

瑤圖纘緒神已御於鼎湖玉冊揚休禮宜陞於太室悼
降年之不永儼立政以如新爰述徽猷以傳信史欽惟

皇帝陛下文明天縱剛健日嚴辨奸邪於嗣位之初彤
廷祇畏廣儀注於治朝之際清廟肅離絕封敕以杜憚
人申憲章以勵多士罰茲無赦令必惟行君臨三載而
有成知周萬物而莫隱豈運逢艱否大命靡終然號謹
追崇尊名是著謹遣某官奉玉冊玉寶上尊謚曰睿聖
文孝皇帝廟號英宗伏惟炳靈有赫歆格無違祔于新
宮以妥以宜

皇后冊文

皇帝若曰在昔正始之道必先內治于以奉承宗祧化
成天下朕嗣大歷服祇循憲章宜資配助用彰位號咨
爾皇后淑慎柔嘉遵道是行輔佐王邸謙抑自持實生
元子國本斯建興龍舊鎮介于紹封粵若臨御之初贊
畫計慮厥相維多正位中宮天神協祥今遣某官授爾
玉冊寶章坤順承天人道攸則表正母儀萬方是觀惟
躬儉節用則徽音是嗣惟求賢審官則私謁靡干匡朕
德格朕心實為有賴詩書所稱罔專美于前代噫敬厥

初終有慶尚其念哉以膺爾景命

特命右丞相詔

帝王之職在論立相予以表正百司綱領庶績朕纂承
丕緒勵精求治然而澤有所未洽政有所未舉豈委任
之道有遺缺與今特命中書左丞相拜住為開府儀同
三司上柱國錄軍國重事中書右丞相監修國史一新
機務使邪正異途海寓乂康以復中統至元之治所有
便民條畫具列于後

云云

於戲朝廷既正著端本澄源

之功風俗斯醇廣摩義漸仁之化咨爾有衆體予至懷
戒飭曲阜廟學詔

郡縣廟學崇奉之制所從來尚矣乃者大臣言曲阜廟
學創建聿新將嚴飭以風厲四方朕甚慕之惟夫子之
道行于天下崇教立化實始於魯可不知其所自與有
司其益加明潔屏遊觀嚴洒掃以稱創立之美敬而勿
褻神明之道也苟完以教夫子之訓也其盡心焉毋怠
閣阜山萬壽崇真宮加大崇真萬壽宮詔

朕慨慕希夷式瞻殊勝蜿蜒磅礴之所茲神必靈虛靜恬淡之徒其用彌廣睠彼仙翁之化境曰惟江右之名區歷年滋多嗣教不墜形而下者謂之地茲實景山神而明之存乎人載加美號承天之大與國無疆

試進士策問

延祐五年三月六日進

制曰蓋聞昔之聖人垂衣裳以成無為之治稽於書傳任賢設教品節備具諄諄然命之矣是無為者始於有為也事久則弊唐虞之世歷年滋多不聞其有弊也治

莫重於定國體尊國勢綱常之分嚴風俗之化一國體
定矣善惡之類明賞罰之制宜國勢尊矣廉遠堂高上
下之辨也量才授官莫得踰越國之大柄也若是者其
道何以臻此記曰禮樂刑政四達而不悖王道備矣夫
禮以防民樂以和志刑以禁暴政以善俗四者何所先
也夙夜浚明卿大夫之德也知其邪慝則知所以儆之
知其困窮則知所以振之為吏習常恬不知省其故何
也繼體守文善論治者尤以為難朕承累聖之丕緒宵

盱圖治罔敢暇豫於變時雍若有缺然者子大夫觀乎
會通酌古今之宜毋迂言高論以稱詳延之美朕將有
攷焉

試進士策問

泰定元年三
月六日進

制曰朕聞自昔聖王之治天下罔不在初政故舜之嗣
位也明目達聰命九官咨十有二牧禮樂刑政之道粲
然備具禹成厥功祇承于帝精一執中實聖聖傳心之
要湯黜夏命以克綏厥猷為本武王勝殷首訪于箕子

天人之際明矣詩之訪落公劉書之無逸立政亦惟成
王嗣服之始君臣交修以成繼志述事之業唐虞三代
其揆一也維我世祖皇帝聖神啓運時則有同心同德
之彥效謀輸忠故能混一區宇治化旁洽朕祗承丕緒
永惟帝王事功見於經傳悉遵而行之時有古今制宜
損益若稽世祖之宏規遠略垂統萬世夙夜寅畏以圖
治安然人才之列於庶位者猶若未及治道之達于庶
政者猶若未備子大夫其以前王之坦然明白可行於

今者何策世祖政典之綱領當今未盡舉行者何事宜
悉心以對以輔朕惟新之治

先農祝文

仲春令月原陸勸耕祇率舊彝以陳明祀惟茲艱食稼
政允修相其陰陽迄獲豐庶

司耨祝文

春土方興曰耘曰耨聿修耕藉庸薦常事維神功協先
農種斂是司除菑布祉以成善歲

太歲祝文

年熟於酉曷敢震驚儻功在初率循其舊爰立寢宇匪
曰廣居尚克相成以祈寧謐

后土祝文

至哉坤元以靜為主匠石踰年寧免震疊寢宇畢治庸
復其初敢伸潔虔克相終事

五方帝祝文

五行之用相須以成維神司之萬物以靈相彼土宇撓

神實多引誠致祈勿譴勿訶

立皇太子告太廟祝文

列聖延洪纂嗣大厯國本聿嚴太后有訓親王大臣僉言允同曰嫡曰長茲惟主器將建冊命首告于宗廟

西鎮祝文

地道靜專載物惟職震竦失恒咎徵莫測側身內修秉德若惕慎其政刑爰別淑慝迺戒輔臣香冊昭格籲復故常以底寧謐

司天臺祭告祝文

太陽

煌煌大明浴光咸池丕冒八表出震見離揆時朱明中
街御輪體乾以行庶物駢臻法茲昭臨實予一人爰潔
芬祀庸遂民因

太歲

歲行歸終福祿是惇四時秉權百神攸遵禮有報祈德
用兆民時將平分雨暘協宜綏此金穰物無癘疵

太衝本命

卯為春門品物彙滋受命自天集茲蕃禧聿嚴省方高明謹持大德曰生繫震是出順陰養陽罔敢暇逸肅迎元本多祜有秩

勝光

鷄火之宮司南秉陽時維長養品物用章繫月之恒儼日以光茲實命元受福無疆芳薦式陳莞輦錫祥

金星

金精呈輝配日後先遇伏斯晦厥用不偏清商助威睽
睽導前爰庸預祈以相坤寧吉蠲匪瀆戩穀是膺

火星

執法麗天俯承太陽曰茲羸縮厥有故常飭德省躬導
迎景光陽居太夏翼翼靡違順執合躔德馨是祈

土星

昭哉填星德隆倭遲煜燿中黃百穀阜滋斟酌元氣導
迎丕基照臨元命肅將以祈嘉薦苾芬留俞靡違

氐宿

蒼龍首東茲維宿殿界于卯辰靡有忒僭經緯或凌曰
有成憲彼不順行曷敢適從虔命宗祝監茲寅恭

房宿

巡狩事嚴百司靡寧率彼徒御興言宵征天星之精實
為準繩凌伏愆常推策布程蘭席令芳祇迎展誠

心宿

布政于宮上稽明堂維茲日永法天以行五緯疾遲渾

象森著謂數實然嗣服彌懼祝冊致詞式筵菲具

尾宿

析木天津燕都所次維昔初基相攸塗墜民用不頗益
遐以治靈臺考占庸啓震悸善言維從式致芬祀

迎神

天佑丕基一誠肅將瞻仰昊穹紫微騰光龍虎森衛鸞
鳳鏗鏘降茲瑤壇八音開張碧雲紆徐肸蠁斯皇

送神

靈旂歆顧靡亟靡遲敬天之休億載維期三垣潤明五曜逶迤玉斗宣光瑤壇受釐懽兮如存脫兮若遺

楠木殿上梁祝文

揆時夏季惟土居中百堵皆作震疊是恐不日以成帝令攸式棟隆之初以底元吉

崇真萬壽宮設醮齋文

序推良月式符坤厚之光誠揭層霄虔致泰元之祝竹官汛潔藥笈宣揚伏願神御顧臨靈旂昭格玉衡齊政

永綏有道之長寶籙延年誕啟無疆之壽三宮悅豫四海乂安

青詞

天佑丕基肇啟乾元之始令行吉月於昭坤德之祥寅
畏在初籲尊惟重伏願監觀有赫敷錫無疆懷德維寧
溥羣生而康乂以慈為寶遂億載之怡愉

皇帝本命長春宮祈福齋文

獻歲肇春懋對亨嘉之序祈天永命式臨元本之辰矯

首層霄延真殊館伏願祥開泰治道合乾剛綏萬邦而
致豐年咸躋仁壽錫五福而建皇極迄底雍熙

青詞

陽和肇歲宜與物以皆春元本建辰敢自天而申命籲
尊為大祇翼若初伏願帝鑒不違神功溥運成四時之
玉燭允協昇平展億載之瑤圖恪依覆燾

昊天上帝青詞

皇極建中密運生成之造玄穹垂象益嚴寅畏之誠禮

謹祈禳功深保佑伏願靈旂下令景緯順躍發政施仁
迓丕基之永固側身修行迎嗣歲之嘉祥

崇真萬壽宮設醮齋文

歲慎省方爰恪遵於祖訓秋嚴報禮庸祇奉於玄科演
繹瓊章敷陳瑤席伏願靈旂昭假叶氣周流玉燭常調
遂家給人足之願皇圖永固致兵寢刑措之風

青詞

嗣守丕基心靡違於寅畏導迎繁祉歲恪謹於修崇維

德在秋自天申命伏願祥雲開瑞景曜宣光怡愉永康
受介福于王母清寧無斁錫皇極於庶民

皇太后為皇太子祈福設醮齋文

天威不遠好生洽於民心帝訓孔昭受祉施于孫子誠
深保佑禮盡禱祈伏願懿馭肅臨雲輿駢集鴻圖鞏謐
允諧載物之功燕翼綿弘永保貽謀之吉

青詞

正位宅中恪守成於祖武承天順則庸徽福以孫謀矯

首層霄傾誠璇極伏願玉衡齊政金篋賜齡重輪重暉
誕保無疆之慶有嚴有翼永恢長治之規

長春宮散壇青詞

祈報聿嚴儼神光之下顧精誠允格荷帝命之密符第
祿攸宜際蟠均慶伏願歲成玉燭政叶璣衡孔蓋繽紛
歸三千之寶所瑤壇馥郁拱百二之皇圖

興聖宮上梁文

旭日蒼龍聳帝京之積翠層霄彩鳳流阿閣之霏烟巍

成少廣之居盛極東朝之禮欽惟殿下道師清淨性合
儉慈色石補天法女媧之妙用瑤池錫宴符王母之長
生穆如薰風之自南繁若衆星之拱北陛下孝嚴溫清
敬謹膳羞謂神遊泰初當廣鬱儀之宇而養以天下益
新長樂之宮庶民子來百堵皆作倚空繡柱栽栽太乙
之揚旌鬬角雕檐奕奕飛廉之奏舞彩宇周遭於禁雉
寶華流曳於縣鷺匠石繕完著龜告吉舉脩梁於地上
川嶽無譁成巨構於域中雲霞得色敢伸善頌庸贊昌辰

拋梁東天雞初唱日輪紅
漢殿瓊卮稱萬壽堯階寶
扇擁重瞳

拋梁西三素雲扶鳳輦低
閨苑碧桃聞已種廣寒靈
藥不須攜

拋梁南薰風殿閣聳眈眈
一色花光濃似酒十分松
露滴如藍

拋梁北帝子天孫來侍側
何須玉檢告昇平擬把瑤
編增鏤刻

拋梁上僊藥輕調承露掌龍圖載見贊無為魚夢維
占歌有象

拋梁下女史未須誇鄧馬聖德重歌韓愈詩徽音願
續周王雅

伏願上梁之後坤元廣大鼎命延弘雲需湛露之恩德
廣陽春之澤松深柏茂三宮同億載之歡風散雨濡九
有順四時之序與天齊壽率土歸仁

皇太后寢殿上梁文

璇宮擁翠刻姑射之層山柏寢通雲儼廣寒之寶所凝
神清淨協德順承皇太后養備東朝尊臨北極天純佑
命握四時而品物亨地用安身御六氣而陰陽理寶典
深調於玉燭珠星連緯於紫躔陛下禮謹家人孝行天
下謂榮觀合老氏之要道而廣居乃亞聖之至言令月
書春惠風司律瑤池湧地龜吐瑞以成形畫棟騰雲燕
銜文而獻秀髣十二樓之縹緲開億萬載之怡愉工師
肅給以無譁多士驩呼而稱慶脩梁舉地率土皆春敢

集歌謠庸仲贊祝

拋梁東
髣髴神君下壽宮
絳闕雲光催曉日
翠簾花影颺春風

拋梁西
靈杵玄霜煉紫泥
露下預知金掌濕
參橫坐見玉繩低

拋梁南
咫尺天居接蔚藍
底用麻姑擘麟脯
共看帝子引鸞駟

拋梁北
色石神功叅太極
物無疵癘樂豐年
道合希

夷超至德

拋梁上紫微鈎陳肅玄象五兵不試太平年三聖重

光天下養

拋梁下內宴傳歡慶朝野遊魚漸識柳邊舟飛鳥時

隨花外馬

伏願上梁之後乾清坤謐月穆星俞擊壤而歌阜康結
繩以後淳厚千萬年永清於四表九五福悉萃于三宮

楠木殿上梁文

天道不言而庶類亨式嚴居所聖人無為而天下治爰
法當陽坐朝知問道之勤側席審思賢之念揆辰考室
申令鳩工欽惟陛下守位建中施仁濟衆陋竹宮之侈
靡羞桂館之虛無宣室受釐未遑鬼神之問石渠論奏
是資經術之明掄梗楠以擬棟梁審律度以合規矩爰
居爰處乃寢乃興歌庶民之子來形四方之風動虹梁
歡舉龜墨告從敢述輿情庸伸善頌

拋梁東一朶紅雲泰嶽峯絳闕翠旌浮曙色玉階星

弁整朝容

拋梁西王母傳宣曼壽齊漏下銅壺催密炬庭傳丹
詔擁金泥

拋梁南薰風殿閣靜潭潭帝子承顏催鶴駕宗王侍
宴擁龍驂

拋梁北紫微熒煌儼宸極五兵奏凱一車書萬國來
朝合圭璧

拋梁上玉燭金釵契玄象陽剛深法泰元尊至孝力

窮天下養

拋梁下百穀芄芄滿原野淳風再使比義黃雅樂重

宣繼韶夏

伏願上梁之後乾坤合德日月順行高拱穆清景化溥
霑於八表茂迎穰簡嘉祥均被於三宮率土歸仁與天
齊壽

普慶寺後殿上梁文

積翠凌空儼諸天之層構側金布地成四梵之妙緣惟

我皇帝陛下味道圓明宅心清淨深植善本靈山之付
囑未忘廣種福田寶所之莊嚴彌奐像設叅前而山立
威儀殿後以雲趨一一青蓮層層貝葉爰以棲神而凝
睇亦云澄觀以集思成祗樹園作平等觀虹梁將舉龍
象具瞻

拋梁東瞿曇瑞世日輪紅一手指天呈實際九旬談
妙演宗風

拋梁西雪山深處鵲巢低白足赤髭隨地見紺眉青

眼倚巖樓

拋梁南要看彌勒與同龕
擎竹莫參朝九九拈鉗且

問後三三

拋梁北大地山河光的的
平齊斗柄布王春深拱宵

衣開壽域

拋梁上堯仁如天高蕩蕩
八風不動太平年四時平

分真實相

拋梁下川后山君擁風馬
赤麟白鴈奏郊丘瑞麥嘉

禾偏原野

伏願上梁之後後天不老景緯齊光玉檢七十二君同
觀三脊金輪萬八千歲共拂銖衣四海永清三宮均慶

天慶寺佛殿上梁文

寶構凌空稱華嚴之富貴青蓮湧地成祇樹之神通雪
堂老禪心匠虛明性宗真淨住南城數十載名滿江湖
祝北闕億萬年日嚴香火雖紺宇禪局之已敞而璇題
祕殿之未雄靈山之法會如新黼扆之綸音已下無踵

而至不日以成繡薨結飛霞稱兩句之龍象金波麗鳩
鵲儼第一之人天爰舉脩梁敢陳口號

拋梁東須彌初見日輪紅願上吾皇千萬壽銖衣拂
石宴春風

拋梁西一朵紅雲映日低不用親遊天竺國只今寶
所總菩提

拋梁南軒窻面面是瞿曇欲問拈花微笑意雪堂老
子睡方酣

拋梁北殿角杲思如翠織鐘魚解作梵王音日把心
香祝宸極

拋梁上大雄之尊壽無量聖朝方是太平初白馬迎
經踵三藏

拋梁下禪板蒲團不須假側金布地擬諸天香鉢如
雲坐長夏

伏願上梁之後乾坤泰治日月恒新豐年調玉燭之和
正法拱金湯之固兩宮萬壽四海一家

天壽節致語

洪範九五福曰壽允屬至人上古八千歲為秋實名治
世仰天門之蔥鬱審雲闕之青園黃道日明式紀老人
之次金莖露肅有開上聖之祥慶浹叢霄歡騰穀旦恭
惟皇帝陛下穆清居位剛健體元雷在地中消羣陰於
既長風行水上示景命於方來辟雍建崇化之規象魏
布新民之法以食為本歸漕粟於中都所寶維賢卻貢
琛於絕域方且端冕以聽古樂惡酒而好善言麴蘖相

臣簫勺多士瞻鳳皇來儀之瑞歌鳧鷖守成之詩克叶
禹謨丕光周道某等伎陳九奏曲合三呼蘭有秀菊有
芳願敷宣於律呂月重輪星重曜行登載於歌謠遙望
天威敢陳口號

羲和御日上蓬瀛盛旦矐矐集壽星冠珮雲排朝帝闕
笙鏞春響藹宸庭瑤池已獻蟠桃實玉殿初開五葉蓂
要識吾皇清淨理長生瓊液養脩齡

清容居士集卷三十五

欽定四庫全書

清容居士集卷三十六

元 袁桶 撰

外制

翰林學士承旨榮祿大夫知制誥兼修國史遙
授平章政事閤復贈光祿大夫大司徒上柱國
追封永國公謚文康

聲音與政通辭莫先於風雅易簡而理得治實效於乾

坤維昔先皇歷選羣彥一道德以垂統嚴誥命以興文
奉璋孔戕執簡有度攷諸遺老號稱名臣具官某學博
而智周材新而意古山立揚休之儀表望重縉紳日光
玉潔之詞華才工黼黻進揆臣而豎國是避政柄以守
儒榮畫旨尚方密勿深符於上意澄清外服咨諏慎考
於民風人物著龜典章衡石遽告休而還里終辭徵以
養年脫屣如歸逝川滋遠噫德輿制詔早已重於人間
居易詩文今果傳於身後載加褒卹式克欽承可

妻李氏贈永國夫人

魯侯燕喜之歌褒其令美敬仲鳳飛之下後將蕃昌事
不偶然理難固必具官某妻某氏韞玉養德佩蘭襲芳
規矩不出於廳屏律呂永諧於琴瑟守大家之戒靜慎
而禮法自防誦季女之詩恪恭而祭祀有度命之不淑
報也宜豐噫茅土並封亦既慰文儒之願玄堂同穴尚
欽承人世之榮可

翰林學士承旨榮祿大夫知制誥兼修國史劉

賡贈三代

曾祖深贈昭文館大學士資德大夫追封邢
國公謚康穆加上護軍

泰山之雲起膚寸而成雨黃鍾之律累銖黍以立均德
胚胎於前人澤膏沐於後嗣具官某曾祖某持身圭璧
篤學巾箱清白儒科曩共誇於鄉黨丹青帝制今復見
於階庭念昔干戈攘擾之艱唯汝詩書種植之懿既開
公社載廣王勲噫天勝人人勝天事果成於昭代子有

孫孫有子慶永萃於一門增秩便藩疏恩冥漠可

祖肅中書左三部尚書商議中書省事致仕
贈推忠贊治功臣金紫光祿大夫大司徒追
封邢國公謚文獻加贈上柱國

乾坤清夷真主昇而四海一風雲際會英傑出而庶績
凝篤生股肱之臣能總喉舌之職亶惟熙運爰立鴻勳
具官某祖某學博而通方才長而守正讀易悟損益之
理觀文叅忠質之宜中歲投閒卒起裴度於既老平居

緩獄審知定國之將興廟堂咨國是於著龜朝野係民
瞻於柱石家聲允似子承曳履之榮書種有傳孫擅掌
綸之美用永厥世以等其功噫四世三公亦既推赫奕
之懿一門萬石尚毋忘孝謹之思可

祖母鄭氏贈邢國夫人

王臣外勞動資邦媛冢婦中饋訓立閭儀具官某祖母
某氏佐餽靖共持家澹素縑紵整比齊襟拱立於北堂
錡釜潔蠲斂衽儼趨於南澗子先仕顯孫復文榮噫沃

壤再疏足示龍光之赫奕芳猷未遠尚瞻象服之委蛇
爰詔後人式共爾位可

父愨中奉大夫護軍彭城郡公加榮祿大夫
大司徒柱國封邢國公

帝堯雍熙擊壤之民鼓腹漢文寬厚扶杖之叟厖眉念
累聖之仁恩俾遺老之壽俊具官某父某脫棄軒冕徬
徉里閭誦讀詩書邈矣師承之舊陟降籩豆優然孺慕
之思壯年幹蠱以裕如晚節撫謙而泰定言追古往耄

及意新種樹養生默合三槐之故事巾車訪俗有符五
柳之曠懷亨嘉真儲水之師朝著仰商山之皓兒年希
有世號少儔噫周公拜前益慎威儀之則韓侯受命毋
忘偃俸之恭可

母彭城郡太夫人李氏追封邢國夫人

貴子而不及親施仁宜厚揚名以之為孝報德是先禮
有追崇恩推錫賚具官某母身同隱遯性一柔嘉蘋藻
恪共於春秋絲麻力勤於夙夜執喪慟絕竟三日而始蘇

佐餽懽違遽中年而長往是生賢嗣爰顯清朝噫翠輅
魚軒亦既極小君之寵蜜章鸞誥尚再疏下泉之恩可

妻冀氏彭城郡夫人追贈邢國夫人

月圓而魄虧理或可詰劒成而神化物莫能推念茲偕
老之盟言詎意中道而淪世具官某妻秉芳蘭蒞佩矩
珩璜奉舅姑以無違處娣姒而彌虔年之不淑生也有
涯噫鄉國大邦追錫永光於窀穸泉臺佳氣周流宜見
於君蒿可

妻廖氏封邢國夫人

相夫之道靜淑是師承祀之儀潔蠲惟謹故貴得以從
其爵而教必先脩其身具官某妻執禮奉盈守德珮玉
事舅嚴雞鳴之間逮下審桃夭之宜噫小君實諸侯之
妻惟謙抑可以長保鉅鹿乃邢子之國惟儉素足以久
安毋替戒詞以底終吉可

集賢侍讀學士中奉大夫李個贈祖父二代

祖懋河東宣撫檢察使贈嘉議大夫吏部尚

書上輕車都尉追封冀寧郡侯謚文惠

乾坤轉旋臣擇君而審事風塵膠轕民徯后以求生匪
資談辨之折衝曷得從容而完聚昔有俊士聞于當年
具官某祖懋沈鷺決機秋毫析理不背時而棄利魯連
感燕將之風能因危以為功陳康歸蕭王之智按堵復
鄉閭之舊開田廣井邑之繁全逃民山寺之中沒猶有
祀憐故帥孤城之守許以自新謂宜撫仕之軒飛迺獨
急流而高避菟裘嘯傲合難兄難弟之懽犢車雍容追

某水某丘之勝才不大用德遺後人噫維此冀方存憂
深思遠之旨嗟爾孫子篤尊祖貴始之誠賜履舊邦克
昌胤嗣可

祖母張氏贈冀寧郡夫人

婦人內訓愈久則事莫可稽聖朝鴻恩雖遠而澤益加
厚錫類者教民之本顯親者繼志之基具官某祖母張
氏語簡而嚴心靜而正敘容如玉家庭服其母儀飭坐
如山鄉閭師其懿德益昌爾後克底于成噫貽厥子孫

不負窀穸之願烝畀祖妣爰疏湯沐之封營魂有知寵
光無數可

祖母某氏贈冀寧郡夫人

孝治天下教必本於興仁惠及萬方禮莫嚴於尊祖爰
念瀛洲之彥庸推下泉之恩具官某祖母某氏韞玉無
瑕服蘭有度采藻行潦雖雖承祀之顏殷雷南山黽黽
勸夫之義生子允才而不淑傳孫濟美而始昌噫一門
同封聿廣聖朝之澤三晉故壤足為里社之榮垂世彌

光終古奚憾可

父昱成都路防城軍民總管贈集賢侍講學士追封冀寧郡公

古澗長松宜棟梁而弗施於太室韞匱美玉器珣璣而莫致於合宮維先朝宣力之臣皆一時成德之彥才不究用沒猶可稱具官某父昱沈思而好文敏斷而濟事地生天施知民悅以阜通城高池深審人和以環守蜀為望郡職號劇曹足食足兵流馬相迎於道上為物為

變飛鳧疑度於雲中天不以年子由之貴噫三牲之養
榮親弗逮於膝前兩谷之間錫土有光於身後式嚴嘉
命爰慰九泉可

母仇氏贈冀寧郡夫人

曾參風木之悲深嗟于身後孟宗冬筍之養得遂於生
前事為至難道無全美具官某母仇氏遵行儉素服習
勤勞不見其夫之榮舜華隕露猶幸有子之似蘭茁承
春肆衍褒嘉同疏追錫意金葩錦綵益增玄宅之光丹

穀文軒允過板輿之樂清朝展慶故里聚觀可

母韓氏贈冀寧郡夫人

孟軻五鼎之饋禮非有踰子路三釜之悲情何可既仕
獲通貴者常有祿不逮養者何多具官某母韓氏家法
儉勤母儀慈惠化治絲枲生兒承撫仕之傳恪共蘋蘩
奉祀守吉蠲之度鬕封已拱口澤猶存肆推錫類之仁
誕布昭天之渥噫黃河一曲千里茲實故鄉白雲孤飛
太行有光前躅烝嘗不墜褒寵如新可

妻許氏封冀寧郡夫人

君子偕老之宜國風所詠家人中饋之吉易象攸存作
則閭儀來嬪瀛彥具官某妻許氏有諧琴瑟相夫之道
無違不出廳屏教子之心彌切惟靜以正既樂且康噫
蟋蟀唐都合儉禮而民始化采蘋南澗循法度而祀迺
修遵錫舊封祇承景命可

集賢大學士榮祿大夫致仕李謙贈光祿大夫
柱國追封魯國公謚文正

祚衍皇圖上聖聿開其正統教興文治鴻儒允際於清
朝四時周而寒暑成八音宣而律呂比道闕運數天篤
忠純具官某藻思夙新蜚聲壯著處身閭里蔚然黃流
之在中策名搢紳熒矣錦衣之尚絅早贊青宮之善迄
編金匱之書疏傳十漸之簡嚴志遂四休之安佚碑板
肆夏辭累貫珠詩篇林泉語深挾纊故老倚之為衡石
諸生仰之如著龜大帶幅巾儼若實之在洛秀眉明目
侔康成之居鄉既得壽以保終宜易名而廣譽土荒東

魯爵列上公噫孔門設科先德行而後文學漢廷取士
首孝弟而次賢良舉世實難唯卿無愧可

妻孫氏追封魯國夫人

夷攷儒學之彥允資賢淑之妻從游外方米帛不干其
念慮敦叙同姓籩豆式謹其威儀古有其人今見于汝
具官某妻某氏溫恭秉度禮制飭躬相敬如賓皓首不
墮其繩墨有嚴教子青燈猶課以詩書惟小君之封用
加矧大賢之忠宜錄爰伸並命以慰九原噫鵲巢而鳩

居之惜未配夫官之貴告往而知來者庶永為婦德之
規於昭營魂哀對天寵可

禮部尚書中奉大夫元明善贈二代

祖海贈嘉議大夫祕書監太卿上輕車都尉
追封清河郡侯謚貞惠

青桐孫枝之良雲和所植紫芝靈根之秀商山是宜隱
顯之用有時報施之效不忒具官某祖某養真巖壑策
名里閭試吏緩刑卒應高門之語抱孫竒骨可勝執硯

之悲器卓犖以不羣量汪洋而莫測李翱之傳皇祖文
已四馳王通之述府君事闕百世禮嚴教孝爵侈勸忠
噫東壁圖書爾尚詔後人之似故鄉湯沐益毋忘昭代
之恩可

祖母高氏追封清河郡夫人

珠藏九淵神光燭而愈閔蘭生空谷幽香耿而自持通
塞維時存歿奚憾具官某祖母高氏慶源演迤淑則和
平種桑而望繭絲亦云勞止樹桐而中琴瑟夫豈偶然

錫類者治世之湛恩尊祖者孝孫之美志噫爵書故里永為粉社之榮稱曰小君益表松阡之觀可

父貢奉議大夫驍騎尉大名縣子贈中奉大夫吏部尚書護軍追封清河郡公謚孝靖

種德如藝木必閱世而始昌保身若奉盈惟持善者無愧窮達有命幽明不渝具官某父某孝友篤躬質直守道簞食卒安於簿領贏金始羨於縑緇不假以年益豐其報孝能繼志鬱成南陽之阡文以顯親行擬龍岡之

表肆加錫爵復舉易名噫丹詔流恩天官實古之冢宰
宸章分土甘陵維爾之舊邦尚其營魂歆此殊命可

母弭氏大名縣太君贈清河郡夫人

孟軻大儒深藉斷機之訓仲由至孝每懷列鼎之悲審
閭範之可遵愍堂封之彌遠具官某母弭氏孝慈有度
淑慎無違禮行於家蘋蘩循治汙之素教施於子斧藻
為朝廷之光已錫鴻恩爰加再命噫九原可作驚書啟
鄉郡之尊八座並榮象服稱小君之號可

妻李氏大名縣君封清河郡夫人

鵲巢起家之因實原勤儉燕喜受祉之美斯為樂康報之厚者始必勞持之素者終不懈具官某妻李氏習熟女史幽閑內儀儼服笄珈執謙沖而彌下恪共籩豆盡蠲潔以無踰百祿是道再命而偃噫相其君子益知典禮之寅稱曰夫人毋忘主饋之訓可

光祿大夫湖廣等處行中書省左丞相阿力海
涯追封太師郡王

四懸設樂必假鏞鐘之洪音八柱承天斯合明堂之巨
構乾坤啟運川嶽降靈是生非常之偉人以佐一統之
真主沒且不朽德猶可稱具官某勇略致身英姿蓋世
羊祜平吳之策誰復先之楊素渡江而來何其神也據
荊州以為之根本擣長沙以披其腹心兵勢建瓴皇威
震電先皇帝知人而善任定功以行封倬彼雲漢之章
廷無儔匹享有金石之奏位班侯王兼將相之重權契
君臣之嘉會令肅風生於細柳政成人指其甘棠念耆

定爾功實有資於贊助而大賚於廟必申錫以褒崇彌
深撫髀之思莫遂圖形之想白雲已往青史如新噫齊
岱為鐫石城為鋒朕已悉皇王之大武黃河如帶泰山
如礪卿允為邦國之元勲詔爾後人無替先德可

妻某氏贈國夫人

鵲巢起家因以為召南之首殷雷勸義足以成大夫之
行矧江漢之舊邦昭柱石之偉績必資內助以佐高賢
具官某妻某氏澹泊無華靜專有守良玉在匱襲中美

以善藏幽蘭生林愛國香而自閔稟北庭之渾厚婉南
澗之恪共方考禮以報功爰推恩而錫類噫西平有子
足彰閭範之光魯侯令妻宜受國封之侈是惟崇德尚
克歆榮可

太尉平章政事某特授太子太傅

朝廷大策慶莫盛於建儲社稷重臣禮尤嚴於敬故功
叅羽翼政倚股肱具官某秉志精忠宣猷惇實黃閣調
元之始允屬謀謨青宮選士之初必先德義惟左右前

後之人正斯君臣父子之道彰噫日重輪月重光宜益
資於輔導書同文車同軌期咸底於昇平往堅乃心祇
若予訓可

遙授平章政事某特封秦國公

宜惟龍飛之初考圖數貢爰篤鷹揚之舊崇德報功出
命告廷分封啟宇具官某蚤乘熙運躬受真才絕北威
名允著長城之助居中韜略密宣前箸之籌肆予纂承
委以輔弼噫干戈弓矢于以昭武功山川土田斯以彰

異渥祇服明命益殫嘉猷可

中書左丞某封贈三代

曾祖某贈資善大夫中書右丞追封高昌郡

公謚康懿

粵昔高昌肇邦藏經史以崇儒師立校官以訓子弟所
從來久矣故其聰明才知通於聲音文字之學代不乏
人具官某曾祖某誦詩讀書漸仁摩義得於鄉里之素
若雲在淵勃然以升蓄極而通至曾玄而始見疏封舊

寓以報流澤之無窮尚其享哉可

曾祖母追封高昌郡夫人

諸侯之制立廟以五親服未盡是猶有待於後也今爾
曾孫某勤勞王家錫之山川土田而汝與封推其自則
由玄孫啓之先王之旨遠矣具官某曾祖母某蓄德不
耀保躬益貞敷佑後人輔弼不懈曾孫之慶至于五世
其昌矣今從夫爵尚承朕恩可

祖某贈榮祿大夫平章政事追封齊國公謚

莊靖

赫赫在上永遵繩武之思子子為孫爰述尊祖之義發揚潛德追錫愍章具官某祖某明珠媚淵良玉韞匱言寡尤行寡悔祿不願干折中矩周中規動無踰則養真於攘擾之際味道於沖漠之初本碩枝繁源深流遠噫稽尚父之返葬咸謂分封仰周公之拜前允宜淑後載嘉正直庸受寵綏可

祖母追封齊國夫人

蘭長空林羞當戶以自獻珠生巨海懼媚川而深藏矧
為隱約之時曷表殊絕之行婦德永闕孫賢可推具官
某祖母某孝敬行於家門肅雖傳於閭里念昔日艱難
之際為善是持至歷年磅礴之多興宗有驗恩分沐邑
賚廣脂田噫綺繡冰紈莫慰生前之願文軒象服足為
身後之榮可

父某贈銀青榮祿大夫大司徒追封齊國公
謚恭惠

大明麗天羣陰伏於蔀室寸雲出岫甘澍徧於寰區崇
德報功之典存繼世象賢之制著惟勲是錄于禰有光
具官某父某潛珍養名砥節礪行王明受福井渫不食
非所憂父教為忠蠡金之藏奚足羨事久斯定時至乃
亨念爾嗣之弘文生聞孫而佐治蟬聯朝著磬折里閭
維積善之粹精宜流澤之溥博詢于集議庸爾展恩噫
泱泱大風知紹封而益茂謙謙終吉詔承德以靡虧可

母追封齊國夫人

積行累功允賴夫人之配承先共祭載歌季女之賢剛柔之道有恒倫紀之位斯定具官某母某氏持守貞白衣被潔清子又生孫莫計堆床之笏善必有慶久高容駟之門議勲以褒蓋臣錫命而及賢配亶惟異數足稱營魂噫三服齊官是在昔女工之訓五鼎廟食亦庶幾孝祀之芬旌寵有光歆承無數可

榮祿大夫宣政院使領延慶使某贈推誠佐理
功臣太師開府儀同三司上柱國追封齊國公

謚文忠

式觀景運灼考蓋臣際乾坤清夷之時承風雲亨嘉之
會精忠儼在褒恤庸加具官某愼愼而行方沈潛而量
厚踐揚禁近官一品以益謙陟降遽嚴閱五朝而彌著
恕能及物廉以律身經文譯潤之功深開宗明義詩書
服習之訓久教子象賢維時輔臣佐我初政壘篋雅奏
圭璋令儀蓋德厚者世必昌勲著者爵宜峻誕開公府
庸正師垣儼精爽以如生合神明而無愧噫保茲青社

斯為胙土之崇封以紫泥益見密章之重體茲申錫期
爾永承可

妻封齊國太夫人

馭爵酬功錄先臣之大節疏恩並命成賢婉之芳猷往
莫追尋生宜悅豫具官某妻某秉心淵靜制行霜嚴悃
悃無華佐餽惟精于五飯溫恭有恪執容儼稱於六珈
是生絲綸之英復得鹽梅之佐入室每諮於慈訓揚庭
爰著其母儀噫誦齊風雞鳴之詩則貞女宜封於東土

歌魯侯燕喜之頌則壽母益介於長年哀對殊恩恭承
令祉可

資德大夫同知宣政院事某贈存誠秉德功臣

太傅開府儀同三司上柱國追封齊國公謚忠穆

帝室興隆君臣交孚而同德王庭肅穆弟兄相繼以共
為睦若昔之揚休越今茲而錫命輿言是採卹典有加
具官某植節秋霜持評水鏡侍元戎于漢上屢奏凱功
奉大帝於禁中益叅聖諦凜有不可犯之色充然無自

滿之心阿閣鳳凰虞廷屈軼績既昭於簡冊望宜冠於
巖廊噫舉賢上功爾猶存太公之生氣慎終追遠卿勿
忘人主之殊恩尚其冥魂享此休寵可

妻追封齊國夫人

王言惟作命揚于庭者為報功內訓不出門宜其家者
為合德有嘉賢婉宜盡褒封具官某妻某秉德芝蘭奉
身玉雪遠行江漢之域勸義不違深居房閨之中服勤
無斁考圖定地錫命續綸噫取妻必齊盖有資於大國

從夫之爵今已謂之小君昭于幽局歆我異渥可

監察御史沙某封贈祖父母

祖某嘉議大夫行工部事專一修築宮城勾
當今贈太傅開府儀同三司上柱國追封某
國公謚武敏

式考皇猷承命以永新邑爰立民極相宅以營成周輪
奐彰施高深鞏固言念梓材之彥興懷棫樸之官具官
某祖父某氣壹而靜專智圓而肅給順陰陽伐材木構

寶殿以如規議遠邇程土功儼金城之有截通四方而
閤缺傳衆力以聿成典制百工論道時趨於清切辨護
少府使民每減其冗煩紫闥深教以手書墨詔屢傳於
宸旨亶惟際遇允協隆平覩設施而舊跡愈彰思典刑
而老臣彌重誕開公爵復廣社封噫召公之誥簡明命
庶丕作蕭相之謀宏遠俾後無加追命煥章營魂昭慰可

祖母某氏追封某國夫人

女教勤閨門夫獲修於六府皇恩治寰宇死得慰於九

原瞻惟蓋臣成于良媛具官某祖母某韞玉制行範金
作程化治絲麻宛昔日稽功之效潔清蘋藻儼承先盡
職之能用施孝孫亦克王事方褒忠以大賚爰追命以
並封噫蜜印昭天益侈桓楹之表脂田廣國式崇柏板
之嚴茂對有光靈承無斁可

茶迭免局使沙正議贈父母

父某正議大夫遙授工部尚書管領茶迭免
局人匠總管

漢官密勿之邃首重細旃周廷朝會之嚴用資陰羽省
方維歲考古若今具官某父某才敏而通時慮深而應
變春秋蹕道環徽廬虎士以無譁風雨屬車望帳殿翠
華而有煥綺如鹿角整若魚麗曉籌爭奮以啟行夕頓
悉安其成列舊規儼在故老能言爰開大國之封式體
先朝之任意相王入大次禮猶想於肅雖論道惟三公
恩豈殊於冥漠詔爾後嗣祇予至懷可

嫡母

世官嗣業古罕其人工師致功今慎其職具官某母某
肅著令德恪嬪大家上承尊章察素絲五紵之儉下訓
子婦審狐腋千金之難爰俾象賢式克紹後億翟第崇
貴已享偕老之時密章廣恩足慰厚夜之望子能謙謹
汝預寵光可

生母

佐中饋之職必假婉柔成繼世之賢實資訓飭泉遇蹇
而利見水積小而始升具官某生母某勤勞夫門光寵

盛代象服之貴宗婦攸同鸞誥之榮鄉人所羨爰相肩
嗣益慎忠嘉可

資德大夫紹慶珍州南平治邊宣慰使播州安撫使侍衛親軍都指揮使上護軍楊漢英贈推忠效順功臣銀青榮祿大夫平章政事柱國封播國公謚忠宣

繼世立諸侯審象賢之有託推恩保四海在追遠以彌加有懷蓋臣庸厚恤典具官某著德遐域效誠先朝聰

敏得於襁褓之初發于天性稚弱置於扈從之側斷自宸衷用能絕黨殊鄰投戈納款尺天寸地負版奉圖先國後已之慮深尊主庇民之績著聞學做文翁之化好賢師鄭武之風雅量鎮浮方橐弓而箠矢澄懷味道時緩帶以輕裘出門興折軸之悲行壘應流星之兆何以勸善必也正名循故壤以加勲衍圭田而封土青綬崇副相之貴袞衣嚴辨章之稱噫忠孝傳家予以顯昭事厥辟之實歿存錫命所宜推圖任舊人之終精爽有知

欽承無斁可

妻田氏遵義郡夫人加播國太夫人

婦人中饋歌采蘋則謹其承先大夫遠行誦殷雷則審其勸義禮有準則行無過踰具官某妻田氏嬪高門之勲庸受外氏之經籍曹大家之女誠奉上克謙衛夫人之僊書教兒能學念王事靡盬之際知女子有行之宜夙夜傳恭寒暑循度噫從夫以貴今已位於小君勉子惟忠益有光於先正茂膺異渥式介長年可

開府儀同三司上柱國錄軍國重事中書右丞相監修國史拜住贈清忠一德佐運功臣太師開府儀同三司追封東平王謚忠獻

八柱承天棟橈萌於巨構六飛御日輻說見於中街愍死難以成仁攷生榮而錫命具官某鼎彝王社閭閱相門自結主知應雲龍之異遇獨特國是炳著蔡之先幾陳於上者不足言見於事者為可則斥聚斂之臣以靖四表誅黷貨之徒以正庶官庫無餘財故葵之訓靡替

門絕私謁懸衡之鑒益公天下望其治平朝廷以之模
楷然盡言招過儉謀愈深選賢與能奸黨滋懼變成肘
腋禍延股肱川嶽動搖日月昏翳雖元兇正罰足明朕
心在壹惠易名姑慰卿意分茅故壤增爵維垣噫未明
入朝竟墮長魚之計盛服假寐孰為鉏耨之賢念此盡
傷恩斯優渥可

妻某氏封東平王夫人

星坼中台輔弼之虧果應舟藏半夜伉儷之情曷勝死

者易名生焉從爵具官某妻某氏素系相關克嬪王門
纂組之功弗訓以習祭祀之謹於禮無違偕老之志莫
酬並封之恩宜厚爰增湯沐庸續絲綸噫司徒之妻問
齊君以予邑蹶父之子樂韓土以相攸宣飭諸孤以保
終譽可

大中大夫內史府司馬狄琮贈榮祿大夫中書
平章政事柱國追封冀國公謚貞毅

山西諸將之英沈雄有自斗南一人之裔正直是傳爰

產魁梧之賢以贊藩輔之政具官某少植奇節壯懷孤忠朱邸掄思引經說以開導細旃密勿詢治道以彌縫挺然廊廟之姿鬱有江海之量才見於用知無不言邊陲以之救寧帷幄以之康濟朕纂嗣大歷圖任舊人方審象以博詢慨撫髀而莫覩興宗有似茲為柏臺之羽儀追遠彌加庸進槐階之品秩噫呂望老而賜履實文王之故臣丙吉生而受封迺悼考之遺德事莫能偶思宜有加可

妻張氏贈冀國夫人

遠行從政閔勤勞者著壺儀修身踐言循法度者執婦
道允矣溫恭之媛疏其赫奕之封具官某妻張氏謙以
自持儉而有守酒食是議春秋之祭無違狐狸為裘風
雪之需悉備既嘗艱阻莫遂恩榮噫兼譽入臺紹祖之
傳彌振僧孺清道思母之念益深尚其營魂承爾嘉命
可

妻劉氏贈冀國夫人

展如邦媛典刑傳於大門
咍兮國英謨謀見於藩邸
天相其配恩與之俱具官
某妻劉氏玕璫母儀纂組
女訓如璞韞石審玉人之
琢磨若鳩在桑信君子之
均一嗣為烏府之模楷母
增魚軒之寵榮噫繼世象
賢予以錄先臣之舊慎終
追遠庶幾彰盛世之光綸
誥下頒營魂祇服可

清容居士集卷三十六

欽定四庫全書

集部

清容居士集卷
三十五

詳校官庶吉士臣張溥

侍讀臣孫球覆勘

總校官降調編修臣倉聖脉

校對官中書臣李鎔

謄錄監生臣胡曉春

謄錄監生臣陳廷瑜

欽定四庫全書

清容居士集卷三十七

元 袁桷 撰

外制

太傅右丞相伯顏贈太師開府儀同三司推誠
翊運功臣淮陽郡王諡忠武

乾坤呈符構風雲之嘉會山川毓秀挺柱石之英賢夙
奉宸猷丕揚帝訓惟不嗜殺人者能得天下而可與事

君者實非鄙夫賤我元勲膺時碩望合太平之寰宇成一統之輿圖生為名臣歿有公論太傅右丞相伯顏機沈而識遠量重而器宏十乘啟行共服征南之妙算七駟咸駕默傳濟北之遺編誓衆於鼓角之初過師於枕席之上具宣德意誕廣仁聲簞食壺漿之迎咸知已後觴酒豆肉之賜士向無前是謂制勝而屈人兵抑亦好生以全天道丞相之功第一智士之譽無雙方謙牧以學卑愈蒙養而用晦角巾私第恂恂似不能言雞翹屬

車斷斷猗無他技肆予纘服躬任受遺功成莫居年運
而往格于皇天者有儀可象游於造物者不見而彰師
尚父之崇名貞惠文之美謚益疏王爵庸示國恩噫彝
器景鐘足銘邦家之偉績密章祿典斯昭泉壤之幽光
尚其明靈歆此殊命可

平章政事廉希憲母某氏贈某國夫人

溫璞出於玄圃貞松產於徂徠良由地氣之完以合天
和之蘊故平章政事廉希憲母某氏柔嘉維則淑慎其

思采蘋采藻之恪恭為締為綌之素儉奉尊章於壯歲
樂其天全率娣姒之諸郎視為已出齊家以禮教嗣以
忠用能為先朝社稷之臣啟奕葉簪纓之慶雖爵從夫
貴莫得而加然義以子賢當崇其本益開湯沐之侈庸
增窀穸之光是為異恩以旌舊德可

忽答的迷失公主追贈某國大長公主

維王展親之道實先於惇叙粵昔慎終之典尤謹於追
崇矧予同氣之賢是惟長主之貴廣疏異數庸寓至懷

忽答的迷失公主玉海澄輝金枝毓秀充然婦德成肅
雖以為穠李之華相其夫家閔勤勞而勸殷雷之義婉
順諧於日就儉慈出於天然美王姬下諸侯固異公宮
之制問我姑及伯姊益深先朝之思胡不百年以永終
譽肺腑之託云在手足之念彌鍾圭薦更湯沐儼舊
爰開名國下慰營魂噫立愛惟親曷愧死生之初志以
義度德莫窮脩短之大原沒而有知服之無斁可

宗正府寶哥贈祖父母

祖某特贈推誠保運翊亮功臣開府儀同三司太尉上柱國追封恒山郡王謚忠靖

風雲初際允資佐命之賢歲月既徂庸厚報功之典竄惟平治爰錫褒嘉具官某祖某貫日精忠凌雲節槩載橐弓矢翊龍德於初潛以為股肱展鷹揚而無敵噫孝文拊髀豈惟思古之名臣顯宗圖形實欲方今於前世九原可作千載如新可

祖母追封恒山郡王夫人

慎終追遠本先王之至仁崇德報功傳有國之令典具
官某祖母某氏從夫早貴訓子克賢如山如河之儀容
宜室宜家之愷悌肇封大國儼焉象服之新益慰九原
歆此蜜章之寵可

叅知政事賈某贈官

朕丕承大業遠究前圖肇邦九有之初紀綱備舉同德
一心之彥贊畫允資慨年運之云徂儼風猷而如昔具
官某經術展緒孝廉起家侍幾微於帷幄之中保身彌

謹識變通於衡石之外得士尤多故一時出令之坦明
皆先帝欲言之旨意器能容物清不近名暨更南國之
旬宣咸謂中朝之倚任方堅退佚益避權姦活千人有
封考於爾嗣德百世而祀論迺至公爰褒賢以勸功復
易名而疏爵噫方叔壯猶之雅雖已美於盛時韋丹遺
愛之碑實有俟於今日皦如精爽綏我寵光可

淮西道宣慰使劉復亨妻趙氏贈某國夫人

圖任舊人式表世臣之重烝畀祖妣用昭孝孫之賢維

德厚者慶益長而爵貴者報必遠具官劉無隱祖母趙氏鐘鼎望族山河令儀使節春行從子從夫之樂備女箴夜誦為母為婦之道金頌臺之彥有嘉漏泉之恩彌廣高堂素象音容猶想於含飴故里佳城湯沐儼疏於刻蜜湛然精爽歆此褒崇可

荆湖北道宣慰使劉澤妻孫氏贈某國夫人

孝治聿嚴誕布蓼蕭之澤聖謨丕顯遐思屈軼之賢念服瘁於外藩允資成于內助恩昭並命光慰九泉具官

劉無隱母孫氏里族高華閭儀淑慎閉戶而行盥饋曲盡婦儀映雪以課詩書咸稱母訓梧槽之飲猶在茵鼎之養莫加位正小君已備治繁之德爵崇大國益攄風木之思可

叅知政事趙世延贈曾祖母某氏雲中郡夫人積德在於百年實資內訓褒封及其三世宜謂異恩勤勞蓋臣服習先矩具官趙世延曾祖母某氏幽蘭雅度喬木舊傳殷雷雖閱其勤克彰忠節采繁不失其職允

佐肅離膏之沃者根必深種之豐者穡益厚顯于西土
咸曰大家維爾曾孫益彰有慶於戲秩秩先廟崇松楸
柏板之儀翼翼小君承錦誥金花之寵奉先追孝錫類
興仁可

平章政事董某封贈三代

九道

曾祖昕贈光祿大夫司徒趙國公謚宣懿

大裘無文可饗于帝良玉韞璞孰窺其珍灼知遺逸之
民邁種渾圓之德克昌厥後不在其身具官董某曾祖

具官某畎畝怡愉里閭退讓開田種朮深期蔽日之輪
囷如山出雲莫測為霖之變化子能擇主孫亦象賢一
門萬石之家聲四世三公之譜牒噫慎終追遠分茅宣
曾矩之光崇德報功推本協孫枝之願亶惟異渥寵爾
營魂可

曾祖母李氏追封趙國夫人

岷山之源若甕而達于海至日之影如線而麗乎天信
知明道不可以計功要在積微因之而成著具官董某

曾祖母李氏槃阿共隱饁畝如賓惟耽積善之勤厥享
降祥之驗百年未遠五世其昌噫象服表儀亦既慰賢
勞之願蜜章刻篆斯有昭孝治之隆可

祖俊贈翊運效節功臣太傅開府儀同三司
上柱國追封壽國公謚忠烈加贈推恩翊運
效節功臣依前太傅開府儀同三司上柱國
改封趙國公謚忠烈

駿命握乾誕啟中天之運豹韜宣武協成上國之光念

風雲之會匪常而日月之流如駛爰新景命以慰故臣
具官董某祖具官某被褐潛修棄書學敵戎馬驅攘之
未定志已出塵雲龍會合之有開獨能就日察敵保臨
淵之智挽彊夸賈札之精釋兵為農所活者衆延師教
子其訓益深馬革裹屍深可憫生前之語虎頭食肉終
有期身後之榮惟德之厚者嗣必昌而功之著者禮必
報肆朕嗣服念爾疇庸爰廣重封以彰異數噫修祖廟
陳宗器在于君臣之交修光王室迓天休惟爾子孫之

無數精爽不昧寵渥其承可

祖母李氏特贈壽國夫人改贈趙國夫人

殷雷勸義於昭婉德之賢柏舟作詩爰表自防之志雖
內教止傳於閨闈而懿範備著於鄉閭具官某祖母李
氏淑慎持家嚴勤訓子斥簪珥以奉賢師之饌化絲枲
以助先祭之供衡宇周旋人不識其面目闔門款洽族
猶想其儀刑雖雙鯉之養弗居而八龍之譽罔替允惟
賢母有光前聞茲予溥澤於世臣庸汝啟封於大國噫

先正昭事已克光竹帛之傳夫人起家式歌承絲綸之訓用昭後嗣永肩一心可

父文炳特賜贈謚金紫光祿大夫平章政事
忠獻公加贈宣忠佐運開濟功臣太尉開府
儀同三司上柱國追封趙國公仍謚忠獻

君臣相資莫喻同心之美忠孝兩立斯為佐命之殊念
汗簡曷能紀其勲而朝著猶足以優其禮維祖有訓非
朕敢私具官董某父具官某沈毅而善謀明恕而敦本

黑頭試邑棄官羞墨綬之卑赤腳從軍絕食望翠華之
幸刑輕典以安反側釋降人以靖流離白日揮戈睥睨
益張其羽翼長風破浪艤艫竟擣其腹心命在養民市
不易肆取麥禾以陋鄭人之過收圖書以成蕭相之功
嶺嶠宣威南人不復反矣朔方請使周公方且膺之恂
恂持儒者之風諤諤挺大臣之節靖念丕圖之建彌深
喬木之思格于皇天雖儼若帝庭之陟降渙其大號必
有加立宅之褒崇錫以嘉名胙之大國掌武襲建牙之

舊開司增立戟之榮九原如生終古永譽噫英才間出
足為邦家之立基盛德無瑕成爾子孫之逢吉載加殊
命以責營魂可

母趙氏追封趙國夫人

鵲巢推夫人之德於配實難碩人歌衛侯之妻其賢可
想具官某母趙氏秉心淑靜主饋柔嘉建事皇姑克奉
甘旨於左右一視諸子莫窺憎愛之後先每傳家訓之
忠勞遂致孤兒之死事噫開脂田而獲上國實謂無儔

被象服以從先塋幸哉有子可

繼母某氏追封趙國夫人

國族世貴鮮執禮以下人王臣功高適合符而姪德具
官某繼母某氏敦厚天性靜專內儀瞻彼南山深得勸
夫之義遵于行潦不失奉祀之恭有子忠賢為我宰輔
噫推恩三世庸疏湯沐之封錫類九原益廣蓼蕭之澤可
繼母王氏追封趙國夫人

嶰谷之竹應律而氣自鳴十洲之膠續絃而奇乃見不

有佐餽曷能相夫具官某繼母王氏組織婦工齊莊母
道歲時鹽饋立蘭玉以無譁春秋烝嘗潔牲醪而有度
嗣子極中書之貴一門疏大國之封噫生也有涯莫稱
魚軒之樂死如可作尚歆驚誥之榮可

所生母樊氏追封趙國夫人

綵衣之養莫罄其私心板輿之歡遂以為美事念風木
之永感惜春草之寸暉具官董某所生母樊氏禮以母
稱義由子貴勞謙終吉竟莫觀垂魚擁笏之榮一視同

仁乃預享刻蜜演綸之寵允惟盛事服我異恩可

集賢大學士張晏贈二代

四道

曾祖宇贈保節功臣銀青榮祿大夫大司徒
追封魏國公謚文愍

韋孟明經諸孫之傳始貴袁安卜葬三士之言若符膏
之沃者日以光德之厚者世益遠具官某曾祖某進修
家塾退靜鄉閭乾坤轉機後服先知之算干戈效勇
舉宗成全歿之悲命也在天幸哉有子噫忠孝一門之

盛事百世可知節義千古之大閑九原不作聿申景命
庸建上公可

曾祖母常氏追封魏國夫人

盛德之報若券取償內訓之施如玉韞璞聿行尊祖之
禮益知起家之難具官某曾祖母常氏澹靜無華儉勤
有素清晨佐餽奉羔韭之肥甘晚歲謀生治蠶麻之靡
密積善有慶沒世不忘噫魯孝孫之詩宜告成于先廟
魏大名之國爰錫命於九原服我鴻恩亶惟異數可

祖英贈純德秉義功臣太保儀同三司柱國
追封魏國公謚簡懿

幽蘭空林抱孤芬而永闕長松古澗垂巨蔭以自完明
其道者不計功非其身者必在子具官張晏祖英德若
不足樂且有儀遇真主之龍興出關而俟喜佳兒之豹
變潛邸以從居官恥商榷之謀接物多任俠之義念干
戈首難彌深丘壟之思歸鄉里自娛益廣子孫之澤考
其篤素允謂安行噫于公之門少高茲言已驗畢萬之

後必大今食其封爰詔後人益光前業可

祖母劉氏追封魏國夫人

德盛起家允著夫人之懿時危秉志有高列女之風蓋在昔以為榮至于今而彌顯具官某祖母劉氏深身蘭服耽耳椿齡重闡期冢婦之興宗一札勸孤兒之入侍忍乃有濟鑄金符緘口之銘安不忘危考室遜飛輦之制勗德若是生賢可知噫祖賚孝孫已極登瀛之貴逮事王母益疏分國之恩幽泉有知純嘏無斁可

資德大夫江南諸道行御史臺中丞于璋贈推
誠肅政功臣光祿大夫平章政事上柱國追封

薊國公謚文簡

善人天地之紀德莫有加君子邦家之基沒猶不朽睠
懷遺直追錫殊封具官于璋志蘊忠貞運逢熙洽慶雲
甘露氣和而動植自宜威鳳祥麟瑞應而猛鷲咸伏華
要屢更於中外靖共彌保其始終緇衣不渝素絲靡替
念在昔菁莪之彥皆先朝棧樸之功年運既徂風猷彌

遠噫劉寬長厚允宜居鼎鼐之官胡廣中庸謂當久臺閣之任事乖往古恩浹九原咨爾營魂服我休命可

妻某氏追封薊國夫人

慎終追遠先王惇俗之盛心崇德報功治朝馭臣之大勸恩褒臺彥澤及閭儀具官某妻某氏靜淑自修柔嘉彌謹珩璜有節動常法於女箴圖史自娛身不逾於內則傷哉無子貴也從夫脂田廣大國之封蜜印慰九京之望噫瑤琴別鵠早已棄於人間寶劍化龍竟相從於

泉下尚期冥漠歆此寵光可

茅山第一峯大茅君特加封東嶽上卿司命太
玄妙道沖虛聖祐真應真君

靜慕玄風灼觀往事無為曰道必刻意繕性而始成修
身乃真非積行累功而莫就大茅君竒操矯俗精思集
虛壹德齋心受龜臺西華之祕旨萬靈受職開金陵句
曲之宗壇丹光千載以如新寶氣三峯而彌固發祥肇
祉民到於今稱之逆雨寧風天之所助順也宜惟作聖

允合祐神孔蓋翠旌祀莫嚴于司命瓊文藥簡禮爰謹
於秩宗假茲聰明佐予平治可

茅山第二峯二茅君特加封定錄右禁至道冲
静德祐妙應真君

合人心理萬物禮宜順於鬼神建皇極錫庶民徵有稽
於暘雨大江以東之地句曲維望而尊土樂昇平歲稱
稔足二茅君中峯司命西華鍊形作牧審煩擾之非修
真得恬淡之要驟鸞導從塤麓儼奏於雲中化鶴來歸

城郭時看於華表朕方推仁以濟衆靈宜妙物以祐民
學道受之以神端有宗於李耳望祀不祈其福誠慕深
於漢文嘉與函生誕數景命可

茅山第三峯三茅君特加封三官保命微妙冲
慧仁祐神應真君

氣化為神握陰陽而執要物來能應遇水旱以成功茲
山之靈以氏為號三茅君不導引而壽體素純為真密
從蒼龍承左右而無間時乘白鵠侍伯仲以遠遊荷天

降休為民請命逍遙容與服光景以如新周流徜徉蒙
祉福而無極肆加褒錫不應隆平埋鼎高峯爰慕軒轅
之有道獻金空谷方薄光武而不為以赫厥靈同歸于
治可

吳全節特進上卿玄教大宗師

運開至治法簡易以合泰元教審宗傳隆繼承以明正
嗣用揚渙號誕聳具瞻具官某孝友中平準繩詞華鏗
乎金石居無思行無慮粹然令名禮為翼知為時協於

王度陟降紫宸而匪懈贊襄琳館而益謙藏珠在淵雲
五色而川媚納息于踵風八景以星從維列聖嚴珪幣
之薦以格天而迺祖受劍印之錫而展世四十餘年專
帝顧畀已行權三千之徒首汝賢小心盡瘁俾超華貫
爰倣舊階侍清祠以表羣公度玉墀而膺六命祇若具
訓允為異恩噫奏陰陽之和以祝釐則諸福可以畢至
通神明之德以事上則庶績底於咸熙守慈儉以佐無
為遵希夷而贊有道式觀素履庸佩綸言可

三十七代仙姑馮淑真特封靖明貞素夫人

紹玄風而展世丕闡帝猷溥內則以疏恩勉從人爵仙姑馮氏簪纓素緒肇悅芳儀姁穀城之傳益師清淨守柏舟之操彌固堅貞受祉惟深錫名斯侈雲龍風虎之慶會亶謂有光舞鳳迴鸞之制書懋承無斁可

昭應宮提點王氏金蓮特贈淵靜玄素真人

寂然不動知來去之有因湛焉長存宜死生之無間辭風雲之際會竟糠粃於世塵爰加異恩以彰殊遇昭應

宮提點住持王氏金蓮早塵椒掖晚謝藥宮修崇密契
於九重錫賚屢承於三接淨如止水斯為至道之宗脫
若太虛實本重玄之體尚歆嘉號庸表將來可

長春宮提點常某授玄門演道大宗師掌教真
人管領諸路道教所商議集賢院道教事

治國以無為惟宗式符要道順物適自然之理允謂至
言長春宮提點常某素篇重玄著龜萬變氣超渾沌灼
知天地之根運際昇平默贊陰陽之化方獨立以不改

彌大盈而若冲爰紹真風以彰人望噫內觀形影斯泉
石之素心外飭身名實朝廷之異渥保茲清淨俾以闡
揚可

昭瑞宮提點張惟一特授全德靖明弘道真人

太一宮提點

神以知來至教匪存於象設人惟求舊褒封首錫於龍
飛念危蹕之宣勤默儲祥而介福坤元具訓渙號揚綸
昭瑞宮提點張惟一泉石古心冰霜雅操侍晨長樂澹

焉若樸而妙感彰澄觀穆清廓乎不驚而衆虛集惟才
全者德不競而正靖者明愈昭闡道王庭葆真沖館噫
有國之母以長久爾尚謹於祝釐立天之道曰陰陽當
益思於觀復恭承嘉命助贊無為可

廣誠靈妙演法真人江南諸路女冠諸宮觀都
提點邵靈瑞特追封宗師

二儀之生根於太極萬物之母始於有名推剛柔迭用
之原悟坤乾交泰之理茲焉觀妙足以表微具官邵靈

瑞野鶴孤標金芝內行亶麻姑之清淑允謂地靈慕南
岳之冲虛聿工草聖通章帝闕備問宮闈燧矣龍光守
大盈而自牧端然蟬蛻享上壽而弗居道氣常新仙風
不墜噫女偶朝徹已傳宗師之篇帝堯時雍爰有化人
之國錫茲美號昭我鴻恩可

冲靖靈妙凝真法師玄元萬壽宮提點盧行益
襲封真人

道要易為功必假相傳之祕名盛難與繼益求自治之

方矧茲女冠之慎修爰出朕綍以示勸具官盧行益沖
澹若璞謹飭自繩侍藥珠之宮宣琳琅而不瀆守萼綠
之訓視金玉以如遺惟清淨者玄學之宗惟簡素者師
資之本斯焉無忝足以有承噫誦赤松中誠之經卑退
為德考南岳內傳之旨齋戒是先可

五雷宗師沖靖先生留用光特加封五雷宗師
沖靖至德昭應真人

天地交泰而雷出奮風霆流形而物露生神行兩間因

體而始有用數合五位由柔而後成剛迺知變動之機
不出陰陽之妙五雷宗師留用光叅合太始摩盪無垠
學道從師罹厄窮而不悔救災禦患卒韜斂以如遺詢
諸長老之言考以輿圖之載損之又損承禎之語若符
生而不生介象之歸非異運隆累洽道慕重玄思其人
如欲見之宜加綸誥告諸往而知來者益勵羽流可

通妙葆真先生高士易如剛特加封通妙葆真
文教真人

式觀修真之徒多出好古之士伯陽柱下習典禮而道
成弘景山中博載籍而書備高士易如剛學通羣藝妙
集衆虛師清淨以避堂可謂簡矣問鬼神而前席殆將
近之韋編之繼絕孰傳洞章之補亡猶在無文不立松
風恍其步虛與時偕行草露晞而羽化方企崇玄之館
爰思列仙之居本無名而有名庸彰往古效先覺者後
覺庶勸將來可

臨江路閣皂山萬壽崇真宮住持四十六代傳

錄嗣教宗師楊伯晉陞加太玄崇德翊教真人
性出於無始存存為成性之門道合於有為生生邁得
道之奧式觀載籍爰有至人吐故納新以調其神齋心
服形以制其炁于以濟衆因茲延齡具官楊伯晉守樸
丹丘潛珍珠館吐息以踵陋熊經鳥申之迂藏珠于淵
握龍變虎騰之要開九籀之祕記傳八景之玄文問年
今見其復丁會月密推其納甲天台之召司馬損數術
以理身羅浮之迎軒轅徹聲色而合德朕悉茲理卿無

復言聿加綽命之殊以重羽流之選噫居安易之序所
當明天地之根修身德乃真宜益究坎離之用贊敷皇
極懋協鴻禧可

毛穎達封真人

主祭丁
甲神

道萬物之奧非虛不能以通微誠百行之源惟靜斯足
以制動聿求佐理爰慕希夷茲得有恒之人以贊無為
之化崇真宮提點毛穎達澄心止水植節貞松禮為翼
知為時澹然無競巧若拙辯若訥休乎有容藏名琳館

之珍養粹玄門之望維昔世祖動遵軒轅占瑤光以探
五行之精通紫煙以嚴六子之用山林肅潔星斗爛明
苟非其人靈弗顧矣不懈于位爾其勉之庸加綸誥之
隆以示真卿之貴噫乾元天下治也浚明用變之功神
物聖人則之敬謹祝釐之效有嘉恬靖永保恪恭可

清容居士集卷三十七